

Naplata RTV takse od strane telekom operatora

Nadzorni odbor i Uprava BH Telecoma d.d. Sarajevo informisali su Vladu i Parlament Federacije BiH o postojećem ugovoru o naplati RTV takse, te njegovim negativnim posljedicama na poslovanje BH Telecoma.

Ugovor o naplati RTV takse koji je BH Telecom d.d. Sarajevo dana 19.02.2004. godine zaljučio sa Javnim servisom BiH i Radio-televizijom FBiH obavezuje korisnike usluga BH Telecoma da plaćaju i RTV taksu.

Jedno od logičnih pitanja koje se postavlja je pitanje neusklađenosti *Zakona o potrošačima* sa *Zakonom o JRTVS*, s obzirom da se ne mogu naplaćivati usluge koje se ne pružaju, što BH Telecom dovodi u nezgodnu situaciju jer može biti i predmet tužbe.

Nametanjem ove obaveze, BH Telecom je imao direktne i indirektne negativne posljedice na svoje poslovanje, ali i pored toga rukovodstvo i radnici BH Telecoma su je savjesno izvršavali i povećavali naplatu prihoda od RTV takse iz godine u godinu.

Naplata RTV takse putem računa za telekomunikacione usluge fiksne mreže negativno se odrazila na broj korisnika BH Telecoma.

Zadnjih godina primjetan je očigledan trend odliva naših korisnika prema alternativnim operatorima radi izbjegavanja plaćanja RTV takse. Tako je broj korisnika fiksne mreže na kraju 2007. godine iznosio 568.341, a na kraju 2009. godine 537.426. BH Telecom, osim što je izgubio više od 50.000 korisnika, ovim je izgubio i desetine miliona KM prihoda. U periodu od 2004. do 2009. godine, BH Telecom je prikupio i uplatio na račune BH RTV emitera sredstva u iznosu od **145.757.000 KM**.

Rb.	Opis	2004. god.	2005. god.	2006. god.	2007. god.	2008. god.	2009. god.
1	2	3	4	5	6	7	8
1	Fakturisano KM	30.048.876,00	31.768.680,00	28.824.223,00	31.949.178,00	35.407.370,90	35.495.839,35
2	Naplaćeno KM	18.804.991,00	20.268.640,00	23.429.257,53	25.031.396,68	27.901.512,97	30.211.390,97

Druga dva operatora svoje obaveze naplate RTV takse izvršavaju daleko ispod nivoa BH Telecoma i, zbog slabijih rezultata naplate, zajedno nisu prikupili ni trećinu sredstava RTV takse u odnosu na BH Telecom.

BH Telecom nastoji da javnost upozna **na koji jačin i na kojem nivou se do sada vršila naplata RTV takse**, što mnogi žele prikriti.

U saopštenju za javnost Samostalnog sindikata uposlenika Javnog radio televizijskog servisa, presijecanje „žile kucavice“, odnosno prestanak naplaćivanja RTV takse na sadašnji način, ocijenjeno je zastrašujućim, ali se navodi i to da stavovi Sindikata ne predstavljaju podršku rukovodnim strukturama FTV-a i BHRT-a.

Osim 80% prikupljene RTV takse, BH Telecom je u periodu od 2007. do 2009. koristio i platio reklamno-propagandne i marketinške usluge RTV BiH u vrijednosti od 2.895.517 KM i RTV FBiH u vrijednosti od 1.885.802 KM, čime je BH Telecom znatno uticao na prihod i ulaganje u javni RTV servis. Na ovaj način i po dvije osnove, BH Telecom i javni RTV emiteri, RTV BiH i RTV FBiH, su postali poslovni partneri.

Zbog brojnih negativnih posljedica na poslovanje i zbog svih ovdje iznesenih činjenica, BH Telecom želi da se pokrene rasprava u Parlamentarnoj skupštini u cilju potpunog informisanja javnosti o svim relevantnim činjenicama, te da se u Vladi FBiH pokrene postupak kako

bi se BH Telecom oslobodio plaćanja RTV takse. Isti zahtjev Federalnoj vladi uputio je i M:TEL, o čemu nije bilo puno riječi na državnoj televiziji. Zašto je to tako i kome to BH Telecom smeta sa svojim argumentovanim nastupom u smislu zaštite svih svojih korisnika?

Uprkos brojnim poteškoćama, BH Telecom je, zahvaljujući prije svega visokoj stručnosti i izuzetnim naporima svih zaposlenika i kvalitetnom upravljanju, ostvario izvanredne rezultate, čime je svrstan u red najuspješnijih kolektiva u Bosni i Hercegovini, kako po finansijskim pokazateljima, broju korisnika, tako i stepenu tehnološkog razvoja i razvoja usluga.